

REGLAMAIN
DAVART
L'ECONOMISAZIUN DA LAS

IMMUNDIZCHAS
PEL
CUMÜN DA VALSOT



(ediziun 2013)
revis 02.05.2025

Mincha term masculin in quist reglamaint vala eir pel gener feminin

Intent e chomp d'applicaziun

art. 1

Quista ledscha regla l'economisaziun da las immundizchas i'l cumün da Valsot cun l'intent da proteger la sandà dals umans, l'ambiant, las auas e l'aspet dal cumün e da la cuntrada. A quista ledscha suottastà l'economisaziun da tuot las immundizchas chaschunadas i'l territori cumünal, cun excepziun d'immundizchas radioactivas, da tössis, cadavers, vanzs da bacharias, confiscats da controllas da charn, auas persas, eui. premiss cha quellas suottastettan a disposiziuns specialas.

Princip

art. 2

Minchün dess güdar in sia maniera da consümar - o cun sia metoda da producziun – a prodüer il plü pac immundizchas normalas e specialas pussibel.

Incumbenza cumünala

art. 3

Il cumün pissera per l'economisaziun da las immundizchas chaschunadas in cumün. El es respunsabel pel ramassamaint, pels plazzals da ramassamaint e pel transport da las immundizchas i'ls implants centrals. El promouva impustüt il cumpostar da las immundizchas organicas e la reütilisaziun da tuot ils materials genuins. El promouva e sustegna ils sforzs per diminuir la quantità da las immundizchas. Resalvadas sun las cumpetenzas da l'associaziun regionala Pro Engiadina Bassa PEB.

Cumpetenzza

art. 4

Il cumün po eseguir svesch l'economisaziun da las immundizchas, per quant cha quella sta in sia cumpetenzza e delegar l'incumbenza ad ün'impraisa publica o privata.

La direcziun cumünala decida a chi surdar las incumbenzas e stipulescha ils contrats.

Dovairs dals chaschunaders

art. 5

Id es obligatoric da far adöver dals servezzans d'allontanamaint, organisats dal cumün. Material adattà dess gnir cumpostà scha pussibel aint il agen üert o aint il quartier. Sco material cumpostabel vegnan consideradas vanzadüras dad üert e da chadafö. Las immundizchas ston gnir zavradas tenor il gener da lur reütilisaziun o da lur allontanamaint.

Las immundizchas chi provegnan d'intrapraisas da commerzi, mansteranza ed industria sun d'allontanar confuorm a l'ambiant, e quai a cuost dal proprietari. Per l'allontanamaint da la roba bloccanta es minchün pisserà da manar quella pro ün'impraisa chi'd ha ils permiss necessaris per tour in consegn tala. Ils cuosts chi resultan van a charg dal singul chaschunader.

Excepziuns

art. 6

Scha las circumstanzas extraordinarias e scha l'observaziun da las disposiziuns da quista ledscha es üna masüra sproporziunada, po la suprastanza cumünala far excepziuns da singulas prescripziuns, premiss cha l'ambient nu vegna donnagià e chi nu vegnan surpassats ingüens oters interess publics. I nun exista ingün dret da far valair excepziuns. Permiss excepziunals pon gnir colliats cun cundiziuns e dovairs. Schi's demuossa sco necessari, ston similis permiss gnir limitats.

Scumonds

art. 7

Id es scumondà da depositar immundizchas i'l liber, p. ex. in auas, i'l god, in chavas da glera, sün prada e sül pas-ch. Id es scumondà da büttar immundizchas in qualsia fuorma aint illa chanalisaziun.

Finanziaziun

art. 8

Ils cuosts chi resultan al cumün da l'economisaziun da las immundizchas vegnan cuvernats cun taxas tenor il princip da proprietà.

Las taxas d'immundizchas scadan adüna la fin da l'on. Schi succeda ün müdaman d'ürant l'on, scada la taxa debitada cul müdaman pro rata.

Las taxas missas in quint ston gnir pajadas infra 30 dis daspö la consegna dal quint da taxas. In cas d'ün pajamaint retardà po gnir quintà ün fit da retard in l'otezza da las tariffas chantunalas valablas quella jada.

Debituors da las taxas sun ils proprietaris dal terrain tenor register fundiari al mumaint da la scadenza. In cas da proprietà cumünaivla sun quai ils proprietaris da cumünanza, in cas da cunproprietà ils cunproprietaris. Pro relaziuns cun dret da fabrica han da pagar las taxas las personas chi dispuonan dal dret da fabrica.

Adressats da quints e disposiziuns sun ils proprietaris dal terrain tenor register fundiari al mumaint da la facturaziun. Pro relaziuns cun dret da fabrica sun quai las personas chi dispuonan dal dret da fabrica, in cas da proprietà cumünaivla o cunproprietà ils proprietaris da cumünanza resp. ils cunproprietaris. Adressata in cas da proprietà in condomini es l'administraziun.

Las taxas cumünalas servan a cuvernar ils cuosts da gestiun dal cumün. Quels cuosts resultan da la construcziun dals plazzals da ramassamaint, da la lavur administrativa, sco eir da tuot las spaisas da gestiun e da mantegnimaint dals implants da deposit, da las spaisas pels cuosts d'investiziun e da las reservas necessarias per renovar ed ameglrdar ils implants. In seis rendaquint maina l'administraziun cumünala, tenor model da quint, detagliadamaing contabilità davart l'economisaziun da las immundizchas.

Taxas

art. 9

La suprastanza cumünala relascha ün uorden da taxas. Quel cumpiglia las taxas per economias ed affars. La suprastanza cumünala decida i'l rom dal preventiv da la chascha cumünala ed orientescha a la radunanza cumünala supra eventuels müdamaints.

Deposit

art. 10

La direcziun cumünala indicha ils lös ingio cha las immundizchas ston gnir depositadas. Per quel scopo metta il cumün a disposiziun centers da ramassamaint in mincha fracziun.

Disposiziuns executivas e controlla

art. 11

La suprastanza cumünala po relaschar i'l rom da quista ledscha disposiziuns executivas e directivas davart l'economisaziun da las immundizchas.

Execuziun d'uffizi

art. 12

La suprastanza cumünala dispuona, premiss ch'ella saja cumpetenta, davart d'uffizi l'allontanamaint o il müdamaint dad implants e situaziuns cuntrari a las prescripziuns. Scha'ls respunsabels nun accumpleschan las disposiziuns infra temp ütil, ordinescha la suprastanza cumünala l'execuziun d'uffizi. Ils respunsabels surpiglian ils cuosts da l'execuziun d'uffizi e garantischan per eventuels dons chi resultan al cumün.

Disposiziuns penalas

art. 13

Cuntravenziuns cunter las prescripziuns cuntgnüdas in quista ledscha, sco eir cunter disposiziuns executivas ed ordnaziuns relaschadas da la suprastanza cumünala, vegnan chastiadadas fin cun fr. 5'000.00, premiss ch'ellas nu suottastettan a la legislaziun dal Chantun o da la Confederaziun. Scha'l cuolpabel agischa intenziunadamaing, po gnir augmantà il chasti maximal. Sch'üna cuntravenziun vain commessa cun exeguir l'affar d'üna persuna giuridica o cun far qualsia lavur commerciala o ufficiala per inchün oter, vegnan applichadas las disposiziuns penalas a quellas persunas chi han agi o vessan stuvü agir in lur nom. Per chastis e cuosts garantischa solidaricamaing la persuna giuridica, la società o il collectiv da persunas. Ils chastis van a favur dal quint da l'economisaziun da las immundizchas. Üna cuntravenziun scada davo tschinch ons.

Disposiziuns finalas

art. 14

Quist reglamaint es gnü acceptà da la radunanza cumünala als 10 settember 2013, revisiun parziala dals 02.05.2025.

El rimplazza tuottas decisiuns trattadas avant chi tilla cuntradischan ed aintra in vigur retroactivmaing pels 01.01.2013.

Ramosch, 23.05.2025

PEL CUMÜN DA VALSOT

Il capo cumünal:



Peder Caviezel



Il manader administraziun:



Christian Poo

Revisiun dal reglamaint davart l'economisaziun da las immundizchas fat bun da la radunanza cumünala als 02.05.2025. Müdamaint respectivmaing complettaziun dal reglamaint, art. 8.